



戎政典第三十三卷

兵制部彙考十九

元二

世祖至元十一年遣軍戍鴨池及建都以伐宋簽軍十萬又移軍戍合答城并益都及以樞密院言覈蒙古軍籍按元史世祖本紀十一年春正月乙酉以金州招討使欽察率襄陽生熟券軍千人戍鴨池庚寅初立軍官以功陞散官格免諸路軍雜賦以忙古帶等新舊軍一萬一千五百人戍建都立建都監遠都護府丁酉勅荆湖行院以軍三萬水弩砲手五千隸淮西行院丙午阿里海牙言荆襄自古用武之地漢水上流已爲我有順流長驅宋必可平阿朮言臣略地江淮備見宋兵弱于往昔今不取之時不能再帝趣召史天澤同議天澤對曰此國大事可命重臣一人如安童伯顏都督諸軍則四海混同可計日而待臣老矣如副將者猶足爲之帝曰伯顏可以任我此事矣阿朮阿里海牙因言我師南征必分爲三舊軍不足非益兵十萬不可詔中書省簽軍十萬人三月庚寅移礪門兵戍合答城夏四月乙亥命也速帶兒將千人同撒吉思所部五州丁壯戍益都五月丙戌汪

惟正以所部軍逃亡乞于民站戶選補從之乙未樞密院臣言舊制蒙古軍每十人月食糧者惟拔都二人今遣怯薛丹合丹覈其數多籍二千六百七十人勅杖合丹斥無入宿衛謫往西川効死軍中餘定罪有差辛丑勅隨路所簽新軍其戶絲銀均配于民者除之六月癸丑勅合答選部下蒙古軍五千人與漢軍分戍沿江堡隘爲使傳往來之衛丙辰免上都隆興兩路簽軍丙寅敕有司閹覈延安新軍貧無力者免之按兵志十一年正月初立軍官以功陞散官格五月便宜總帥府言北路軍經今四十年間或死或逃無丁不能起補見在軍少乞選擇堪與不堪丁力放罷貧乏無丁者于民站內別選充役從之詔延安府沙井靜州等處種田白達達戶選其可充軍者僉起出征六月潁州屯田總管李珣言近爲僉軍事乞依徐邳州屯田例每三丁內一丁防城二丁納糧可僉丁壯七百餘人并元撥保甲丁壯令珣通領鎮守潁州代見屯納合監戰軍馬別用從之又按志十一年正月以忙古帶等新舊軍一萬一千人戍建都調襄陽府生券軍六百人熟券軍四百人由京兆府鎮戍鴨池命金州招討使欽察部領之十二月調西川王安撫楊總帥軍與火尼赤相合與丑漢黃兀刺同鎮守合答之城

至元十二年簽河西軍及平陽等路達魯花赤弟男爲軍又籍河南舊簽軍爲兵與雲南軍並隸行省罷招討司所收乾討鹵人籍爲正軍 按元史世祖本紀十二年五月遣肅州達魯花赤阿沙簽河西軍六月戊申簽平陽西京延安等路達魯花赤弟男爲軍辛亥勅淮京元帥府發兵及鄂州戍兵與李璫舊部曲并前河南已簽軍萬人後免爲民者復籍爲兵並付行中書省七月簽雲南落落蒲納烘等處軍萬人隸行中書省 按兵志十二年三月遣官往遼東僉揀蒙古達魯花赤千戶百戶等官子弟出軍詔隨處所置襄陽生券軍之爲農者或自願充軍具數以聞五月正陽萬戶劉復亨言新下江南三十餘城俱守以兵及江北海南潤揚等處未降軍力分散調度不給以致鎮巢軍滁州兩處復叛乞僉河西等戶爲軍併力勦除庶無後患有旨命肅州達魯花赤并遣使同往驗各色戶計物力富強者僉起之六月僉平陽西京延安等路達魯花赤弟男爲軍萊州酒稅官王貞等上言國家計平殘宋弔伐爲事何嘗以賄利爲心彼不紹事業小人貪圖貨利作乾討鹵名目侵掠彼地所得人口悉皆貨賣以充酒食之費勝則無益朝廷敗則實爲辱國其招討司所收乾討鹵人可悉罷之第其高下籍爲正軍命各萬戶管領征進一則得其實用二則正王帥弔伐之名實俱便

益從之 又按志十二年二月詔以東川新得城寨逼近夔府恐南兵來侵發鞏昌路補簽軍三千人戍之三月海州丁安撫等來降選五州丁壯四千人守海州哀海 又按志至元十二年十二月上尊號受冊告祭天地宗廟調左右中三衛軍五千人爲蹕街清路軍

至元十三年括獵戶鷹戶爲兵放新附三衛老弱者還家又選生券軍充侍衛軍 按元史世祖本紀十三年夏四月己卯以待衛親軍征戍歲久放令還家期六月各歸其軍五月己酉括獵戶鷹坊戶爲兵六月甲子朔勅新附三衛兵之老弱者放還其家己巳命東征元帥府選襄陽生券軍五百充侍衛軍 按兵志十三年十月命別速解忽別列八都兒二人爲都元帥領蒙古軍二千人河西軍一千人守斡端城

至元十四年括上都隆興北京西京四路獵戶爲兵選蒙古漢軍相參宿衛 按元史世祖本紀十四年春正月甲辰命阿朮選銳軍萬人赴闕己未括上都隆興北京西京四路獵戶二千爲兵五月乙卯選蒙古漢軍相參宿衛 按兵志十四年正月詔上都隆興西京北京四路編民捕獵等戶僉選丁壯軍二千人防守上都中書省議從各路答配二十五戶內取軍一名選善騎射者充官給行

資中統鈔一錠仍自備鞍馬衣裝器仗編立牌甲差官部領前來赴役十二月樞密院臣言收附亡宋州城新附請糧官軍并通事馬軍人等軍官不肯存恤多逃散者乞招誘之命左丞陳巖等分揀堪當軍役者收係充軍依舊例月支錢糧其生券不堪當軍者官給牛具糧食屯田種養 又按志十四年五月以蒙古軍與漢軍相參備都城內外及萬壽山宿衛仍以也速不花領圍宿事

至元十五年定軍官承襲之制簽雲南諸色人充軍申嚴無籍軍擄掠及傭奴代軍之禁又選江南銳軍爲侍衛親軍併軍士免商戶餘丁其元帥府招討以下官俱再當正軍一名詔揀諸路軍士力乏絕者爲民遣各路兵戍隆興府及廬州川蜀又定軍民異屬之制及蒙古屯戍之地 按元史世祖本紀十五年夏五月勅主兵官若已擢授其舊職宜別授有功者勿復以子孫承襲申嚴無籍軍擄掠及傭奴代軍之禁選江南銳軍爲侍衛親軍秋七月復上都守成軍二千人爲民九月壬午朔勅以總管張子良所簽軍二千二百人爲侍衛軍俾張亨陳瑾領之詔分揀諸路所括軍驗事力乏絕者爲民其恃權豪避役者復爲兵所遣分揀官及本府州縣官能核正無枉者陞爵一級又減至元九年所括三萬軍半以爲民其商戶餘丁軍並除之 按兵志十五年正月定軍官承襲之制凡

軍官之有功者陞其秩元受之職令他有功者居之不得令子姪復代陣亡者始得承襲病死者降一等總把百戶老病死不在承襲之例凡將校臨陣中傷還營病創者亦令與陣亡之人一體承襲禁長軍之官不恤士卒及士卒亡命避役侵擾初附百姓者俱有罪雲南行省言雲南舊屯駐蒙古軍甚少遂取漸長成丁怯困都等軍以備出征雲南闊遠多未降之地必須用兵已僉爨人一萬爲軍續取新降落落和泥等人亦令充軍然其人與中原不同若赴別地出征必致逃匿宜令就各所居一方未降處用之九月併軍士初至元九年僉軍三萬止擇精銳年壯者不復問其貲產且無貼戶之助歲久多貧乏不堪樞密院臣奏宜縱爲民遂併爲一萬五千諸軍戶投充諸侯王怯憐口人匠或託爲別戶以避其役者復令爲軍有良匠則別而出之樞密臣又言至元八年于各路軍之爲富商大賈者一百四十三戶各增一軍號餘丁軍今東平等路諸奧魯總管府言往往人死產乏不能充二軍乞免餘丁充役者制可十二月樞密院官議諸軍官在軍籍者除百戶總把權準軍役其元帥招討萬戶總管千戶或首領官俱合再當正軍一名按又志十五年三月分揚州行省兵于隆興府初置行省分兵諸路調遣江西省軍爲最少至是以南廣地闊阻山谿之險命鐵木兒不

花領兵一萬人赴之合元帥塔出軍以備戰守四月詔以伯顏阿朮所調河南新僉軍三千人還守廬州六月命荆湖北道宣慰使塔海調遣夔府諸軍士七月詔以塔海征夔軍之還戍者及揚州江西舟師悉付水軍萬戶張榮實將之守禦江中八月命江南諸路戍卒散歸各所屬萬戶屯戍初渡江所得城池發各萬戶部曲士卒以戍之久而亡命死傷者衆續至者多不著行伍至是縱還各營以備屯戍安西王相府言川蜀旣平城邑山砦洞穴凡八十三所其渠州禮義城等處凡三十三所宜以兵鎮守餘悉撤去從之九月詔發東京北京軍四百人往戍應昌府其應昌舊戍士卒悉令散歸十一月定軍民異屬之制及蒙古軍屯戍之地先是以李璫叛分軍民爲二而異其屬後因平江南軍官始兼民職遂因之凡以千戶守一郡則率其麾下從之百戶亦然不便至是令軍民各異屬如初制士卒以萬戶爲率擇可屯之地屯之諸蒙古軍士散處南北及還各奧魯者亦皆收聚令四萬戶所領之衆屯河北阿朮二萬戶屯河南以備調遣餘丁定其版籍編入行伍俾各有所屬遇征伐則遣之 又按志十五年五月總管胡翔請還侍衛軍先是宿州蘄縣等萬戶府士卒百人有旨俾充侍衛軍後從僉省嚴忠範征西川旣而嘉定重慶夔府皆下忠範回軍留西道翔上言從之九

月以總管張子良所置軍二千二百二十二人充侍衛軍士

至元十六年罷五翼探馬赤重役軍括造礮軍匠至京師又選南軍充侍衛者二萬人詔發新附軍及蒙古漢軍戍碭門魚通黎雅定江南上中下路各置達魯花赤又調江南軍戍太原大名衛州蒙古軍河西軍戍韓端城 按元史世祖本紀十六年春正月壬子罷五翼探馬赤重役軍二月詔湖南行省于戍軍還塗每四五十里立安樂堂疾者醫之饑者廩之死者藁葬之官給其需三月壬子囊加帶括兩淮造回回礮新附軍匠六百及蒙古回回漢人新附人能造礮者俱至京師夏四月詔諭揚州行中書省選南軍精銳者二萬人充侍衛軍併發其家赴京師仍給行費鈔萬六千錠六月詔發新附軍五百人蒙古軍百人漢軍四百人戍碭門魚通黎雅秋七月置東宮侍衛軍定江南上中路置達魯花赤二員下路一員勅發西川蒙古軍七千新附軍三千付皇子安西王己未以朶哥麻思地之算木多城爲鎮西府勅以蒙古軍二千益都軍二千諸路軍一千新附軍五千合萬人令李庭將之八月調江南新附軍五千駐太原五千駐大名五千駐衛州九月乙丑以忽必來別速台爲都元帥將蒙古軍二千人河西軍一千人戍韓端城十一月乙卯罷太原平陽西京延安路新簽

軍還籍罷招討使劉萬奴所管無籍軍願從大軍征討者 按兵志十六年正月罷五翼探馬赤重役軍三月括兩淮造回回礮新附軍匠六百人及蒙古回回漢人新附人能造礮者至京師五月淮西道宣慰司官昂吉兒請招諭亡宋通事軍俾屬之麾下初亡宋多招納北地蒙古人爲通事軍遇之甚厚每戰皆列於前行願効死力及宋亡無所歸朝議欲編入版籍未暇也人人疑懼皆不自安至是昂吉兒請招集列之行伍以備征戍從之九月詔河西地未僉軍之官及富強戶有物力者僉軍六百人十月壽州等處招討使李鉄哥請召募有罪亡命之人充軍其言使功不如使過始南宋未平時蒙古諸色人等因得罪皆亡命往依焉今已平定尙逃匿林藪若釋其罪而用之必能效力無不一當十者矣十一月罷太原平陽西京延安路新僉軍還籍 又按志十六年四月選揚州省新附軍二萬人充侍衛親軍併其妻子遷赴京師 又按志十六年二月命萬戶孛朮魯敬領其麾下舊有士卒守湖州先是以唐鄧均三州士卒二百八十八人屬敬麾下後遷戍江陵府至是還之四月定上都戍卒用本路元籍軍士國制郡邑鎮戍士卒皆更相易置故每歲以他郡兵戍上都軍士罷于轉輸至是以上都民充軍者四千人每歲令備鎮戍罷他郡戍兵六月礮門魚通及黎雅諸

處民戶不奉國法議以兵戍其地發新附軍五百人蒙古軍一百人漢軍四百人往鎮戍之七月以西川蒙古軍七千人新附軍三千人付皇子西安王命闊里鐵木兒以戍杭州軍六百九十人赴京師調兩淮招討小廝蒙古軍及自北方廻探馬赤軍代之八月調江南新附軍五千駐太原五千駐大名五千駐衛州又發探馬赤軍一萬人及夔府招討張萬之新附軍俾四川西道宣慰使也罕的斤將之戍幹端 又按志至元十六年分大都南北兩城兵馬司各主捕盜之任南城三十二處弓手一千四百名北城一十七處弓手七百九十五名 按續綱目十二月元增置宿衛元宿衛皆領於四怯薛以太祖功臣博爾忽博爾朮木華黎赤老溫四族世領怯薛之長怯薛者猶言分番宿衛也年勞既久卽擢爲一品或以才能任使貴盛雖極一日歸至內庭則執事如故其後怯薛增至四千八百衛而累朝幹耳朶怯薛尤多國之大費每靡於此

至元十七年詔禁侍衛軍供匠役遣兵戍魚通黎雅及居庸關口以蒙古侍衛總管爲親軍都指揮使司又遷調江南鎮戍軍官及以蒙古軍更戍潭州又益八番戍卒 按元史世祖本紀十七年春正月丁卯詔母以侍衛軍供工匠役三月丙午勅東西兩川發蒙古漢軍戍魚通黎雅夏四月甲午

勅軍戶貧乏者還民籍五月辛丑朔樞密院調兵六百守居庸關南北口秋七月辛丑廣東宣慰使帖木兒不花言諸軍官宜一例遷轉江淮郡縣首亂者誅沒其家官豪隱庇佃民不供徭役宜別立籍各萬戶軍交參重役宜發還元翼詔中書省樞密院翰林院集議以聞戊辰命范文虎等招集避罪附宋蒙古回回等軍八月乙亥蒙古侍衛總管爲蒙古侍衛親軍都指揮使司十二月辛未以高麗中贊金方慶爲征日本都元帥密直司副使朴球金周鼎爲管高麗國征日本軍萬戶並賜虎符甲戌復授征日本軍官元佩虎符按兵志十七年正月詔以他令不罕守建都布吉解守長河西之地無令遷易三月同知遼東道宣慰司事張鐸言江南鎮戍軍官不便請以時更易置之國制既平江南以兵戍列城其長軍之官皆世守不易故多與富民樹黨因奪民田宅居室蠹有司政事爲害滋甚鐸上言以爲皆不遷易之弊請更其制限以歲月遷調之庶使初附之民得以安業也五月命樞密院調兵六百人守居庸關南北口七月廣州鎮戍士卒初以丞相伯顏等麾下合必赤軍二千五百人從元帥張弘範征廣王因留戍焉歲久皆貧困多死亡者至是命更代之復以揚州行省四萬戶蒙古軍更戍潭州十月發砲卒千人入甘州備戰守十二月八番羅甸宣慰司請增戍卒先

古今圖書集成
是以三千人戍八番後征亦奚不薛分摘其半至是師還宣慰司復請益兵以備戰守從之 又按志至元十七年三月發忙古鰥抄兒赤所領河西軍士及阿魯黑麾下二百人入備扈從 又按志十七年七月詔江淮諸路招集答刺罕軍初平江南募死士願從軍者號答刺罕屬之劉萬戶麾下南北既混一復散之其人皆無所歸率羣聚剽掠至是命諸路招集之令萬奴部領如故聽范左丞李拔都二人節制

至元十八年增大都巡兵選侍衛軍備扈從併貧乏軍三萬戶爲一萬五千取貼戶津貼正軍充役按元史世祖本紀十八年二月詔以刑徒減死者付忻都爲軍三月己亥勅黃平隸安西行省鎮遠隸潭州行省各遣兵戍守夏四月戊子置蒙古漢人新附軍總管九月甲子增大都巡兵千人十二月丁未議選侍衛軍萬人練習以備扈從 按兵志十八年二月併貧乏軍人三萬戶爲一萬五千取貼戶津貼正軍充役四月置蒙古漢人新附軍總管六月樞密院議正軍貧乏無丁者令富強丁多貼戶權充正軍應役驗正軍物力却令津濟貼戶其正軍仍爲軍頭如故或正軍實係單丁者許傭雇練習之人應役丁多者不得傭雇軍官亦不得以親從人代之 又按志十八年正月命萬戶

張珪率麾下往就潭州還其祖父所領亳州士卒并統之二月以合必赤軍三千戍揚州十月高麗王并行省皆言金州合浦固城全羅州等處沿海上下與日本正當衝要宜設立鎮邊萬戶府屯鎮從之十一月詔以征東留後軍分鎮慶元上海澈浦三處上船海口

至元十九年定軍官襲職之令分兵戍守江南又遣揚州射士戍泉州括江南逃軍以綦公直言黥逃軍使從軍令蒙古戍軍更番還家簽亦奚不薛軍立沿河巡禁軍及分遣兵戍曲先鎮達按元史世祖本紀十九年二月壬寅命軍官陣亡者其子襲職以疾卒者授官降一等具爲令乙巳改羅羅斯宣慰司隸雲南省徙浙東宣慰司於温州分軍戍守江南自歸州以及江陰至三海口凡二十八所四月遣揚州射士戍泉州勅以大都巡軍隸留守司庚戌拘括江南官豪隱匿逃軍五月乙酉元帥綦公直言乞黥逃軍仍使從軍六月發六盤山屯田軍七百七十人以補劉恩之軍勅宣慰司等官毋役官軍丙申發射士百人衛丞相他人不得援例亡宋軍有手號及無手號者並聽爲民癸卯禁濫保軍功乙巳招無籍軍給衣糧七月庚午令蒙古軍守江南者更番還家壬申發察罕腦兒軍千人治晉山道立馬湖路總管府九月乙丑簽亦奚不薛等處軍十一月壬申以勢家爲商賈者

阻遏官民船立沿河巡禁軍犯者沒其家癸酉分元帥墓公直軍戍曲先十二月阿里海牙復鎮達
軍發軍千人戍守以其地與西川行省接就以隸焉 按兵志十九年二月諸侯王阿只吉遣使言
探馬赤軍凡九處出征各輿魯內復征雜泛徭役不便詔免之并詔有司毋重役軍戶六月禁長軍
之官毋得占役士卒散定海答刺罕軍還各營及歸戍城邑十月僉發漸丁軍士遵舊制家止一丁
者不作數凡二丁至五丁六丁之家止存一人餘皆充軍 又按志十九年二月命唐兀解於沿江
州郡視便宜置軍鎮戍及諭鄂州揚州隆興泉州等四省議用兵戍列城徙漕泉宣慰司於温州分
軍戍守江南自歸州以及江陰至三海口凡二十八所四月調揚州合必軍三千人鎮泉州又潭州
行省以臨川鎮地接占城及未附黎洞請立總管府一同鎮戍從之七月以隆興西京軍士代上都
戍卒還西川先是上都屯戍士卒其輿魯皆在西川而戍西川者多隆興西京軍士每歲轉餉不勝
勞費至是更之

至元二十年定川廣戍軍更番例括宋手號軍設官統之益兵戍雲南詔定五衛軍更番又以蒙古
漢軍戍邊及簽河西質子軍及丁者充軍 按元史世祖本紀二十年二月戊子定兩廣四川戍軍

二三年一更廩其家屬軍官給俸以贍之辛丑定軍官選格五月戊午丞相伯顏諸王相吾答兒等言征緬國軍宜參用蒙古新附軍從之己未免五衛軍征日本發萬人赴上都縱平瀛造船軍歸耕撥大都見管軍代役六月戊申用伯顏等言所括宋手號軍八萬三千六百人立牌甲設官以統之仍給衣糧七月調軍益戍雲南丙寅立亦奚不薛宣慰司益兵戍守冬十月甲午詔五衛軍歲以冬十月聽十之五還家備資裝正月番上代其半還四月畢入役時各衛議先遣七人而以三人自代從之丁酉忙兀帶請增蒙古漢軍戍邊從之以忽都忽總揚州行省唆都新益軍庚子許阿速帶軍以兄弟代役己酉簽河西質子軍年及丁者充軍按兵志二十年二月命各處行樞密院造新附軍籍冊六月從丞相伯顏議所括宋手號軍八萬三千六百人立牌甲設官以統之十月定出征軍人亡命之罪爲首者斬餘令減死一等又按志二十年八月留蒙古軍千人戍揚州餘悉縱還揚州所有蒙古士卒九千人行省請以三分爲率留一分鎮戍史塔刺渾曰蒙古士卒悍勇孰敢當留一千人足矣從之十月發乾討鹵軍千人增戍福建行省先是福建行省以其地險常有盜負固爲亂兵少不足戰守請增蒙古漢軍千人樞密院議以劉萬奴所領乾討鹵軍益之

至元二十一年置潮贛吉撫建昌戍兵以高麗軍千人屯耽羅定擬軍官格例增兵戍金齒國放乾討鹵軍還家 按元史世祖本紀二十一年三月甲戌置潮贛吉撫建昌戍兵六月庚申改蒙古都元帥府爲蒙古都萬戶府砲手元帥府爲砲手萬戶府砲手都元帥府爲回回砲手軍匠萬戶府七月塔剌赤言頭輦哥國王出戍高麗調旺速等所部軍四百以往今頭輦哥已回留軍耽羅去其妻子已久宜令他軍更戍伯顏等議以高麗軍千人屯耽羅其留戍四百人縱之還家從之八月丁未定擬軍官格例以河西回回畏吾兒等依各官品充萬戶府達魯花赤同蒙古人女直契丹同漢人若女直契丹生西北不通漢語者同蒙古人女直生長漢地同漢人已酉御史臺臣言無籍之軍願從軍殺掠者初假之以張渡江兵威今各持弓矢剽劫平民若不分隸各翼恐生他變詔遣之還家按兵志二十一年四月詔潭州蒙古軍依揚州例留一千人餘悉放還諸奧魯十月增兵鎮守金齒國以其地民戶剛狠舊嘗以漢軍新附軍三千人戍守今再調探馬赤蒙古軍二千人令藥刺海率赴之 又按志二十一年八月江東道僉事馬奉訓言劉萬奴乾討鹵軍私相糾合結爲徒黨張弓挾矢或詐稱使臣莫若散之各翼萬戶千戶百戶牌甲內管領爲便省院官以聞有旨可令問此軍